

H O B O R N A M A

India:

Mohammad Arfat'ore Erido, Refugee Okkolore Muddot Sara Bon-gori raka Hothom goro

UN'or Tonzim'or fúañti Fortify Rights'e monzokkamozin dori bon-gorar uore shekayot goijje

(Bangkok, June 4, 2024)— India'r hokumothottu fóuran ar hono shoroth sara Mohammad Arfat'ore erido'n saa, Mohammad Arfat oilde uggwa Burma'r Rohingya refugee ar insaani hokkor hefazot goroiya zibare hono wajah sara doriyore bon-gori eijjede aijja theen bosorottu-aro beshi orr, Monzokkamozin Bon-gorede iyanor uore hamgorede einla uggwa UN'or dair ("Working Group") fúañti Fortify Rights'e noiya shekayot goijjede iyanot maze aijja hoiye. India't maze Mohammad Arfat'ore muddot sara ar beshi deri fuan bon-gori raikkede iyanor babute Fortify Rights'e UN'or dai iibattu ekkan rai saar ar Arfat'ore fóuran ar hono shoroth sara eri dibolla awaz tulayr.

"India'r hokumothottu Mohammad Arfat'ore ar ekku doilla halothot asede oinno refugee okkolore fóuran eridon saa boli," Fortify Rights'or begginor do'or officer, Matthew Smith'e hoiye. "Arfat'ore hotokkal'olla bon-gori raikke iyan ozana, monzokka mozeen ar India'r kanoon'or helaf. India'r hokumotho ekku doilla gori dori bon gori raikkede endila shoth-shoth Rohingya refugee okkolor butore Arfat ekzon o akzon."

UN'or Working Group hodde iiba uggwa azad insaani hokkor beshi zanoiya okkolor tonzim, ziba bekanooni yato monzokka mozin dori bon gore'de eindia case iinore tahakik goribolla ar moshuwara dibolla boli hoiyore UN Human Right Council'or duara banagiye.

Fortify Rights'e UN'or Working Group iibare May'r 30 tarikot 20 sabbar ekkan document zoma diye, fúañti Mohammad Arfat'or case'ore ar tar azad takibar hok'ore modoth goribolla aro 90 sabbattuario beshi document zoma diye. Shekayot gane monzokka mozin dori bon gorar babute ekkan moshuwara de ar oinno aro shuwarish or fúañti India'r hokumotho re fóuran ar hono shoroth sara Mohammad Arfat'ore eridibolla dorhas gore.

Mohammad Arfat'or torfottu UN'or Working Group iibar fúañti shekayot zoma goribar age, Mohammad Arfat'ore doijjede adde dori bon gori eijjede iinor babute iibar ar iibar ukil loi Fortify Rights'e hotha hoiye. Fortify Rights'e iibar case'or mutallek official document okkolor nokol okkol haasil goijje, ziinot maze affidavit, court or rai ar funanir hokum okkol shamil ase.

UN'or Working Group iibaye zette bon gori raka're bekanooni isafe mone gore, ette tara dori bon gori rakede manuish iibare eridiya, iibar hotifuron diya, ar iyan zene dubara no'o iin'or babute hokumotho re moshuwara de ar shuwarish gorae.

Mohammad Arfat oilde uggwa 31 bosoiija Bormar Rohingya refugee ziba genocide ottu basi aishshe ar insaani hok'ore hefazot goroiya uggwa juan manuish. India'r hokumotho iibare 2020'r December'or 23 tarikot Assam hode zaga iyanottu doijje, beshi maradora goijje, ar ek deshottu arek deshot faraibar mutallek hosuri okkol loi hosurbon banaiye, zodio iiba UNHCR or matehatot register goijja uggwa refugee. Mohammad Arfat'ore hosurbon toronor bade, Assam or Karimganj hode zaga iyanor Judge'e ek bosoror ziyol maijje ar India'r 1,000 tiya fain maijje (Ameraiça'r prai 12 dollar).

Gelde teen bosorot maje, Indiar hokumote Mohammad Arfat'ore di'yan ziyolot ar ekkan Detention Center yani bon'gori rakede eindila ekkan centerot bon gori raikke– Karimganj sho'ror ziyolot ar Silchar morkozi ziyolot– ar Indiar Assam'or Goalpara Matia Detention Center'ot maze o raikke. Ilibaye 2022'ot maze ek bosor'or ziyolot hadi felaiye, tarbadeo 2023'ot Assam'or high court'e defedaiyede eindila ekkan sidi, ziyon Fortify Rights'e fori saiye, iyanor mutabek Indiar hokumote dabi goredde ki boli hoile New Dheli't maze asede Bormar Embassy'e Mohammad Arfat'or nationality yani bormar deshor oi naki no iyan fakka no gora foijjonto iibare bon gori raka oiye zene iibare Bormat wafez fargarai di fa're. New Delhi't maze ziyon Bormar Embassy ase iyan oilde Bormar militari hokumotor contrulot, ziyon Rohingya okkolore [deshoiitta bonibar hokkottun](#) nezami inkar goijjede iyanolla aar [Rohingya koum hotom goijjede iyanor zimmadar](#) isafe gu'da duniyattu zana ase. [Americar hokumot'e](#), [U.N. Fact Finding Mission'e](#), Fortify Rights'e aar oinno manush okkole Bormat maze Rohingya okkolor helaf koumhotom gribar sabut okkol dolagoizze ar check goizze.

Matthew Smithe hoiyede, "Bormar military'e uggwa Rohingya refugee deshoitta oi ne no iyan zasai gora foijjonto entazar goronnan beshi oshantir hota aar hono maanisara, zede eki military'e Rohingya okkolor wojutore inkar gorat ase ar Rohingya manushore hotom goribar kushish zari raikke. Indiar hokumotottu deshfarar hosurilo doijjede Bormar refugee okkolore fouron eridiya foribo aar Bormar National Unity Government yani NUG or nomainda, zarare mainshe vote diyore banaiye tara're shorik gora foribo."

E hobor'gan lekar e-foijjonto, Indiar hokumote Mohammad Arfat'ore teen bosor fas mach yani 1,200 dinot tuaro beshi ziyolot bon gori raikke ar e-mamela iyanor uore Assam'or Guwahati High Court'e homoth 14 bar case iyan fuinne. Court'or hokum mutabek Mohammad Arfat'or ek bosorot ziyolot furon onor bade' o hono hosuri sara ibare bon gori raikke.

Dunyar Insani hokkor kanoon mutabek monzokka mozin honikkare dori bon goron mani, ekkan deshor zoriya yato e-deshor nomoinda okkolor zoriya uggwa manuisher azaadi re marum goron ziyonon hono kaanooni buniyad nai, ashagora noza, nainsaafi yato manisara ar duniyar Insani hokkor razinama ye fakka gori diyede insanon buniyadi hokkor ar azaadir kanoon ba'nge.

U.N. Working Group on Arbitrary Detention yani Monzokka mozin doriyore bon-gorede iyanor uore ham gorede eindila uggwa UN'or dai'e azaadit tun ma'ruoom gorare bekaanooni isafe mone gore zodi iyan UN'or dai'e doridiyede eindila [fas kisimor ek kisimot](#) maze fore. Mohammad Arfat'or torfottu dayer goijjede shekayot'ot maze, India't Mohammad Arfat'ore bon'gori raikkede iyan UN Working Group'e doridiyede fas'o kisimor andhare monzokka mozin bon gora hoiyore Fortify Rights'e sabut der.

Foilla lombor, Mohammad Arfat'ore 1950'or passport kanoon'or 6 lombor'or helaf goijjede iyanolla hosurbon banail ar ziyolot di'il. India't maze 6 lombor kaanon'ore 1980'r passport kanoon'ot maze baad diyar bade loti ar estemal no gore, ziyonore loiArfat'ore dori bon gori raikkede iyan bekaanooni.

Dusra lomborot, Universal Declaration of Human Rights (UDHR) yani Insani Hokkor Duniyar Elan'or 13 lombor'or article'e aar International Covenant on Civil and Political Rights (ICCPR) yani Aam-manuisher Hok adde Siasi Hokkor uore Duniyar Razinamar 12 lombor'or article'e solafira gori faribar hok ar ek deshottu arek desh'ot sari zai faribar hok geranti gori diyede iinor kanoon bangiyo re, Indiar hokumote Mohammad Arfat'ore azaadi tun maa'room goijje. Iinor bade'o, UDHR'or 14 lombor'or article mutabek, hokumote Arfat'or azadir hok ar zulomottu sahara tuwaibar adde faibar hokkor helaf goijje ar ekku fuainna gori takifaribar hok ziyon UDHR'or 7 lombor'or article'e aar ICCPR'or 26 lombor'or article'e geranti di'il iyanor kanuoor helaaf'o goijje.

UN'or Working Group'e hodde, "sahara tuwon'nan ekkan dunyar insaani hok, iyanore amol goronnan hosuri oit nofare." Dai iibaye aro hodde, ek deshor manush arek deshot bekaanooni golede adde takede mamela iyanore bodda hono hosurir suke no-sawn sa, aar zodi hono deshe bekaanooni deshot farade iyan'ore hosuri banaito saa, ette iyan ekkan desholla ziyen jayes ase iyanottuaro do'or oizagoi."

Teen lomborot maze, Mohammad Arfatore Insaf sara aar time mozin funani sara aar muddot sara bon gori raka orr. Bisar deri war hota hoyto zaiyore, Mohammad Arfat'or ukile Working Group'ore zoma diyede document'or hissa isafe ekkan affidavit zari goizze, ziyenot hoodde:

Indiar safai oilde iitara Mohammad Arfatore wafez Bormat fargarai dibolla ham goror aar Bormar Embassy're Arfat'or babute zasai goribolla shidi leikkede iyanor hono juwab Bormar torofottun nawfa. India'r hokumote lagatar e-niti iyan mani zaar harone Borma'ye beshi time fa'ar.

Assamor high court'e 2024'or May mashor 30 tarik'ot maze e mamela gan abar fuinne, zette hokumote "deshoittayi zasai" goribar karwayi solat asede iyanolla aro shomoir aroz goijje.

Sair lomborot maze, Mohammad Arfat ekzon refugee ziba bisar sara yatoba hono rehai sara lamba shomoi foijjontot hokumotor kobzat maze ase. Iyan duniyar niyom-kanoon okkolor adde ICCPR'or 9 lombor article'or helaf.

Ahirittu, Mohammad Arfat'ore Musulman ar Rohingya'de iyanolla forok goriyore bon gori raikke. 2019 ot maze, [UN'or haas uggwa nomoinda'ye hoiyede India't maze lagatar soledde Rohingya okkolor helaf forok gora](#) iiyane, India'r hokumote UDHR, ICCPR ar CERD yani Haar kisimor Zat forok gorare Hotom goribolla ham gorede uggwa alomi Forum okkolor kaanoon mani solibo hoiyore wada di'ilde iinore ba'nge.

Fortify Rights'e hodde, India'r hokumote Mohammad Arfat adde oinno refugee okkolre oshantir halotot maze bon gori raikke. Indiar hokumote Mohammad Arfatore iibar femilittun alog gori raikke aar Mohammad arfatore adde aro bon gori raikke de iinore dabai goitte inkar goijje. India't maze eindila eki halothot asede "bideshi okkolore" bon gori rakede eindila center okkolot maze buniyadi shuzug-shuida ar zedun hafore edun haibar haana nai boli hoiyore zana giye.

India eindila ekkan desh ziyane kulle dunya'ye mani soledde eindila kanoon aar ICCPR'or 9 lombor Article manibo hoiyore sign goijje, ziyane refugee aar hizorot gori aishshede manush okkolore monzokka, bekaanooni, yatoba muddot sara dori bon goronnan ezazot nodae. Refugee okkolore age check goron aar zetodoilla dusura rasta ase iin beggin zasai goron'or bade hono surot nofaile ahiri bebosta isafe hoito bon gori raka zait fare.

Indiar kanoon or 21 lombor article'e e-hokkan ore hefazot gore: "Kayem goizza Kanoonor mutabek bade hono manushore ibar zindegi yatoba azadit tun ma'oom gora nozaibo."

India'ye UDHR adde ICCPR'ot maze sign goijje aar CERD're mani loi'ye, ziin beggine nainsafi bafe doriyore bon gorattun hefazot gore.

Zodi'o India'r bideshi okkolor'la banaiyede kanoon'or 3 lombor article mutabek india'r morkozi hokumotore zehono tokkar bideshi okkolor uore pabondi lagaibar ektiyar de, eindila pabondi iin CERD'r matahate India'ye goijjede wada iinor ulda nogoron saa. Zehono pabondi'ye refugee'okkol kanoon'or muntun ekku fuainna oi'bar hok'ore no bangon saa ar India'r Constitution'or 14 lombor article'or kanoon mutabek kanoonor fuainna hefazotir hok'ore'o no bangon saa.

India'ye sign goijje lekin zulum adde oinnainno berahmoti, insaniyot nai de eindila, yato ijotot hani ode eindila bebaar'or yato sáñzar helaf UN'or Convention'ore monzur no gore. India sign goijjede eindila ekkan desh isafe, [desh'óttu neelai nodibar](#) ze Osul ase iyanor amol goronnan foroz, zennan hamaka mana forede eindila ekkan duniyar kanooun. CAT yani zulumor helaf hamgorede einla uggwa UN'or Convention zibar 3 lombor Article'e desh'óttu neelai nodibar ze osul ase iyan'ore kayem gore, zian'e hono ekkan deshore e-deshor butore asede hono manuisho re en hono ekkan deshot wafes fargarai dibar ezazot node zede manuish iibattu zulumor mukabela gora foribo. India'ye [age Rohingya're Bormat maze fargarai diyede](#) iiyane hamaka mana forede eindilla ekkan duniyar kanoon bainge, ze bormat fargarai diye e-Borma'ye Rohingya okkolor helaf soledde koum hotomor, larair hosurir, aar insaniyotor helaf hosurir zimmadar.

Fortify Rights'e hodde, India'attun o 1951'or UN Refugee Convention'ot aar UN'or 1967'or Protocol'ot sign goron saa ar iinore mani solon saa.

2023'ot maze, [New Delhi't, Jammu't, Manipur'ot, aar Assam'ot maze India'r hokumote einla aro Rohingya okkolore muddot sara bon gori raikkede iyanor babute](#) Fortify Rights'e document goijje.

Matthew Smith'e hawdde, "Refugee okkolore hefazot goronnan India'r kanooni zimmadari, aar eindila hefazoti'ye manuish'olla adde shomaz'olla aro shanti ane." "India'ttun refugee okkolore muddot sara aar monzokka mozin dori bon gori raka iyan bon goron saa aar Borma'r doilla deshot maze honoshote fargarai no don saa zede itarattu maramarir yatoba zulumor mukabela gora foribo. Mohammad Arfat Bormar genocide'ottu basi aishshede eindila uggwa refugee onor zoriya aijja teen bosorottu'aro beshi ziyol hada forer.